

明名臣言行錄

明名臣言行錄卷第十三

知縣顏忠惠公伯璋

名瓊以字行廬陵人建文元年以薦授沛縣令靖  
難師入沛自經死南都追諡忠惠

以善政撫民未幾南北構兵官軍駐德州淮北之民終  
歲給餉瓊布置有方民不告勞三年辛巳六月望北  
兵直擣濟寧過沛民皆竄匿兵退設法招來之復業  
如故九月設豐沛軍民指揮司集民壯五千築七堡  
爲備禦計尋調三千益山東軍所存皆疲弱不任戰  
焉

四年正月兵駐沙河二十二日北兵來攻遣縣丞胡先  
百戶邵彥莊詣徐都督告急二十六日攻益急呼弟  
珏及次子有爲曰兵勢如此孤城無援汝歸白大人  
旣爲人臣子職弗克盡矣題詩察院壁曰太守諸公  
鑒此情只因國難未能平丹心不改人臣節青史誰  
書縣令名一木豈能支大厦三軍空擬築長城吾徒  
雖死終無憾望采民間達聖明是月二十二日夜二  
鼓靖難兵入東門指揮王顯迎降公冠帶升堂南拜  
慟哭曰臣無能報國遂自經死時年五十有爲不忍  
去復還見父尸遂自刎以從珏脫走濟寧逾月還沛

詢邑人知胡先已收葬公父子於沛南關外乃至徐  
告公友人晏璧璧與公同郡宦於徐因爲公傳其事  
言公善事父母友于兄弟睦于族嫻鄉黨稱其六行  
無異辭以故守令知而薦之及爲沛令數以事至徐  
又同督運德州每連床共食談誦慷慨練達機宜淡  
喜鄉郡之有人屬縣之得賢長吏也古語云謀人之  
軍師敗則死之謀人之邦國危則亾之若公寄百里  
之命素志已定視死如歸賢于人遠矣觀此璧亦行  
誼君子也正統中御史彭昂爲公起墳祠祀之

知縣鄭惠節公恕

字本忠仙居人建文四年城破死之南都補諡惠節

治尚書能賦詩善書畫好古博雅家甚貧釜魚甑塵一介不妄取蕭然斗室日與學徒數十人講論經理高風勁節一時敬嚮寧波知府禮聘爲昌國訓導未幾陞蕭知縣留心撫字民愛敬之建文四年靖難支將王聰攻破蕭公死之年五十六後籍其家二女當配亦死之子濂湜姪溫汲謫北平種田

教授陳貞愍公思賢

廣東茂名人靖難詔至慟哭于明倫堂而死南都  
補諡貞愍

質直好義洪武末爲漳州府學教授以忠孝行藝最諸  
生隨才教誨多所成就文皇靖難詔至慟哭曰明倫  
之義正在今日遂堅臥不出迎率其徒伍性原陳應  
宗林珏鄒君默曾廷瑞呂賢卽明倫堂爲舊君哭臨  
如禮郡人執送京師思賢暨六生咸以身殉或曰死  
于道嘉靖中提學副使邵銳立祠祀之

教諭王貞烈公省

字子職吉水人北兵至坐明倫堂率諸生慟哭而  
死南都補諡貞烈

洪武五年領鄉薦進京詔免會試命吏部次第擢用公  
以親老乞歸養尋以文學徵上親試稱旨當殊擢公  
自陳才薄親老乞便養得浮梁教諭外艱起復改睢  
陽凡八年又改濟陽靖難兵至公爲游兵所執從容  
引譬詞義慷慨衆舍公公歸坐明倫堂伐鼓聚諸生  
謂曰若等如此堂何爲名明倫今且勿多論只說君  
臣之義何如公大哭諸生亦哭遂以頭觸柱死女靜

適卽墨周簿聞靖難兵至濟陽謂父必死三遣人訪  
竟得遺骸歸葬公子禎爲夔州通判亦抗節死賊中



吏目鄭貞莊公華

臨海人字思孝洪武十八年進士謫吏目北兵至  
不屈死南都補諡貞莊

初授行人奉使川廣稱旨受賞建文元年註誤謫東平  
州吏目靖難兵起謂其妻蕭曰吾義必死奈親老汝  
少何妻泣對曰君能爲國妾獨不能爲君乎乃稱病  
尋醫携家托友人無錫丞趙次進亟還州州長貳以  
下盡棄城走公獨率民吏憑城死守憂勞病甚水漿  
不入口者三四日北將朱能攻陷東阿分兵取東平  
公曰守土之臣義不苟生請援山東又不至乃力疾

戰不屈死時年甫三十台州祀于八忠祠

主簿唐公子清

不知何許人

在沛有善政民愛之知縣顏伯瑋令沛專調兵食一切  
邏察事皆付之北兵執公欲殺之將兵者欲且留公  
曰願從顏令於地下死之

典史黃公謙

不知何許人

以儒生爲沛典史果敢能戢下伯瑋禮遇之益効力盡  
職北兵執之使至徐招降公感顏知己願與同死亦  
死之

知縣向公朴

字遵博慈谿人宋文簡公敏中之後洪武中授獻縣令北兵至被執懷印死年四十三

父壽宗慈湖之學世稱爲樂齋先生公益精究其旨力學養親洪武二十五年命督府都事張允直訪求人  
才以公應詔陛見帝問居家何爲對曰種田其容秀  
而文上心知其非耒耜中人也因詢大麥何以四節  
對曰以其占四時耳授獻縣令單車就道不携妻子  
兵燹之餘闢荆棘畚瓦礫教百姓農桑與同甘苦流  
移漸復業北兵起獻當兵衝無城郭乃集民兵激以

忠義與北將譚淵迎戰衆寡不敵被執懷印死獻民  
哀之拾遺骸葬道左後陳瑛爲都御史瑛亦獻人也  
懷怨死事諸臣最濫請究治不已有楊姓父子懼瑛  
知狀發掘貧夜負骨潛葬邑北十里永樂初王中秘  
尹實北上詢得葬所夜夢公服血污葛衣共談往事  
起秉燭爲文乘星月往哭之涓川令韓彥起匿其二  
子于任司諫顧道輯其遺事書于寶峰庵佛座三人  
者皆義士也二子道淳道微道淳被徵稱痼疾不赴  
有王偉元攀柏悲號之風嘉靖間公祀本縣鄉賢祠  
隆慶五年又祀獻縣名宦祠萬曆初奉詔撫按建祠

本縣北門外王尹實韓彥復顧道附祀別室楊氏父  
子服食焉

舉人劉公政

字仲理長洲人

父有經學爲沛縣教諭公聰敏力學治春秋建文元年秋方孝孺試京畿士千五百人題命論語托孤寄命節不可奪章得公卷孝孺喜曰此烏中孤鳳當虛左處子是科登書二百十四人公第一四年建文君遜位殺孝孺公慟哭不食死之或曰公在永樂中誓不復仕投徒終其身



生員高公賢寧

濟陽人儒學諸生義不就職遣歸

受學于教諭王省建文中貢爲國子生靖難兵攻濟南  
不下以箭射書城中使亟降公時在城中作周公輔  
成王論射城外請罷兵靖難後被執文皇曰此作論  
秀才耶秀才好人命官之公固辭其友紀綱時爲錦  
衣指揮倖用事勸公就職公拒不聽曰君以軍旅發  
身余本書生食祿有年于義不可綱言于上得遣歸  
年九十七卒

安節龔先生詔

字大章崑山人建文中爲金川門卒靖難兵入勸  
哭而歸隱居不仕鄉黨推重南都補諡安節

父晉洪武兵科給事中戍五開死公年十四勾補伍調  
守金川門靖難兵入大勦變姓名王大章遁歸方大  
索夜走任陽投馬陳二氏匿大困中卽困中讀書間  
夜渡婁省母更二十餘年禁稍解賣藥授徒人固知  
之無告者

宣德中周文襄撫江南具禮訪問兩薦爲松江太倉學  
官堅不就曰詔仕無害于義恐負往日城門一勸耳

繼後巡撫者亦皆有書論世務所言不售而自賦云  
胸中有長劍一日幾迴磨剛腸疾惡而言必以忠信  
孝友訓子弟委曲詳盡尤長于詩景泰中吳民大飢  
寄葉文莊民風詩數章有杜荀鶴時世行風致漫錄  
一二一經水旱便流離風景蕭條思慘悽到處喚春  
空有鳥連村報曉寂無鷄頽垣棄井荒蕪宅苦調哀  
音凍餓妻更有社公同寂寞年來不復享豚蹄鍋無  
粒粟竈無薪只有松楸可濟貧半賣半燒俱伐盡可  
憐流毒到亾人無子獨與一老婢居破廬中有田三  
十畝種豆植麻歌咏自得而於聲利紛華泊如也年

雖高而耳目聰明矍鑠健步出入未嘗乘輿馬一日  
小有不安顧左右謂曰吾將逝矣早跋涉艱危瀕于  
九死幸獲全遺骸今日復何憾哉成化己丑正月癸  
未年八十有八卒時整冠端坐讀大學一章有氣起  
屋上門人謚曰安節先生所著有野古集

邑人沈魯銘其墓曰蚤罹世故多危疑中更因伏幾不  
支雖有利器將安施詩書之樂慰我飢文章節義慰  
我悲年垂九十志不移嗚呼先生後進師

戍卒儲貞義公福

字無錫新安鄉人洪武初隸燕山衛籍

年二十餘頗好義建文末挈母妻逃去文皇卽位詔挨  
購戍卒入伍至燕山公在錄中調曲靖衛復挈母妻  
以行因仰天哭泣曰吾雖一介賤卒義不爲叛逆之臣  
在舟中日夜哭泣不輟竟不食而死母韓妻范爲營  
地葬之范時年二十有姿色居貧奉姑甚謹每哭其  
夫則走山谷中大號不欲聞之姑也官有聞其寡者  
欲委禽焉旣而聞其事曰此節孝婦也我安忍犯之  
一日范往澗水邊浣衣見其傷草生若蘇席草因取

之織席售養姑姑賴以存姑年七十餘終營葬爲廬于墓傍范年八十餘卒席草遂不生土人義之卽其廬葺爲菴集尼居之名崇孝菴

明名臣言行錄卷第十四

長史葛果愍公誠

不知何許人以進士爲燕府長史死于發難之日  
南都補諡果愍

建文元年燕王使公奏事京師覬朝廷所爲帝召問府  
中事情公不敢隱遂密有委托使公爲內應公許諾  
還燕復命王以其詞色有異遂淡疑之燕王佯病瘧  
暑中四圍皆著火猶自言寒三司官入問疾皆懼危  
篤獨公告之以不得于君之故因令人上變會燕王  
遣人至京奏事齊泰等言于上執之旣成獄卽發符

逮燕府官屬而張曷謝貴受密命約公與護衛指揮  
盧震爲內應燕王旣擒曷貴尚扶雙杖而坐燕府官  
屬賜宴行酒方進西瓜命校尉拳碎之已而曰水出  
不堪取刀剖之于是兩廡伏兵盡出捽葛誠盧震下  
殿王乃擲杖曰我何病爲爾等奸臣所迫耳誠震不  
服遂斬之後族其家



燕府伴讀余公逢辰

字彥章宣城人或曰鎮江人靖難兵起泣諫不從  
死之

洪武中選充燕府伴讀已遷教授漸親信用事建文初  
成祖密謀靖難公叩頭出血力諫請執藩節知不可  
挽間洩謀中朝使者成祖自京師歸稱病篤大暑圍  
爐搖顛曰寒甚宮中亦杖而行朝廷聞之稍稍弛其  
防矣公與長史葛誠密告藩闕張昂謝貴曰王本無  
恙公等勿懈恐一旦不可測成祖猶丁寧溫諭與相  
效翊公遺書與其子訣示以必死及兵起慟哀陳說

者再四竟伏誅萬曆改元邑令姜奇方奉詔建祠

長史程端直公通

字彥亨績溪人洪武庚午舉人官遼府長史文皇  
登極逮至京死獄中南都補諡端直

少有至性動必遵禮嗜學不倦洪武乙丑貢入太學丙  
寅父喪徒步過嶺迎柩還葬葬已廬墓三年哀慟毀  
形妻子至不相識戊辰復太學時祖父平年已老公  
上書言臣壯而無父祖猶父也臣祖老而無子孫猶  
子也更相爲命今邊徼戍卒如林願豈少臣祖者辭  
極懇切書奏高皇憐之持其章不下私驛召其祖既  
至乃并召公東西立玉階下顧問曰汝識此人否祖

孫相對哽噎不能仰視高皇歎曰孝哉若人命兵部  
除其籍驛送平還鄉庚午公舉應天試時遣諸王將  
兵行邊以封建策諸貢士於廷對稱旨親擢第一授  
遼王府紀善辛未從王閱武臨清壬申從之國遼東  
時王府未建祖喪歸復廬三年復任未幾高皇上賓  
庚辰從王渡海南還北平兵起草封事數千言陳備  
禦之策辛巳進左長史明年十月王徙國荊州從行  
悉心輔導王敬禮之國事皆以咨焉先在遼府中衛  
士紀綱者山東黜生也狡猾善訶事得幸公每召而  
笞戒之文皇卽位綱得見留爲錦衣指揮使被寵乘

間言公前有封事械公詣京師庾死家人發戍邊簿錄其家得塲田數十畝遺書數十百卷牯皮數張黃希范方知府事雅與公善至是亦爲衛卒所捕并籍其家同赴京師而績溪程姓最衆幸使者仁恕罪止一房餘獲免焉

明名臣言行錄卷十四

長史石公撰

山西平定人

洪武中爲寧府左長史靖難兵起諸郡縣皆下公在大寧言于主將獨嚴守備上怒攻拔之得公不爲屈遂支解而死

長史劉剛節公璟

字仲瓌青田人文成公次子官谷府長史文皇登極逮至京不屈自經死南都補諡剛節

弱冠涵濡經傳喜談兵究極韜畧握奇諸書偉貌豐髯  
議論英發甌賊葉丁香叛延安侯唐勝宗討之決策  
于公破賊還薦公才畧上喜曰公真伯溫兒矣太祖  
宣諭吏部命襲父爵公回奏有長兄之子鷹在上大  
喜命鷹襲爵考宋制除公閤門使隨駕傳旨次年八  
月陞谷王府長史從王之國宣府上諭曰凡事執正  
兵機尤不可忽公設險足兵諸邊屏息嘗至燕文皇

與公奕公輒勝文皇曰卿獨不少讓我耶公正色曰  
可讓處璟不敢不讓不可讓處璟不敢讓也靖難兵  
起公馳還京獻十六策不聽令叅議李景隆軍事景  
隆又不聽景隆戰敗公夜半渡蘆溝河水陷馬斃公  
力破冰跳躋岸冒雪走良鄉裂趾跛行三十里公子  
豹自大同赴難越良鄉至涿州遇公翼上馬南奔知  
軍事多悞必不可支稱疾求歸見許建文三年輿疾  
赴闕進聞見錄千萬言又不聽令還家待用明年六  
月建文帝遜位公稱疾不起法官論公逃叛逮至京  
臨別姻戚舉餞之曰皇上神武何止唐文皇先生忠



良允爲魏徵可也。蓋承順天心，不宜自底刑戮。公瞪目曰：爾謂我學魏徵耶？吾生死之分已決矣。及入對，猶稱殿下。且曰：殿下百世後逃不得一箇篡字。下詔獄，辮髮自經死。法官希旨緣坐其家，上不許得歸葬。嘉靖乙酉，提學副使萬潮肖像配享文成祠。所著有《易齋文集》十卷、《無隱集》偈頌二卷。

雲門道忞讚《無隱集》云：無隱公雖處仕途，翼讚王公，乃于無隱之法，用隱身之術，故能敲空作響，與世混同。若有耳目聰明文字學者，莫能測其涯涘也。吾觀閻門公謁見太宗皇帝時，當機一語聲前，句後斬盡葛

藤何等觴兩公又有雜興詩云老禪真箇野狐精談  
話滔天信不行睡到盡頭無一物碧天流水若爲情  
此處用得耳目聰明文字學否請雲門老漢再下一

語

列朝詩集

長史龍忠愍公鍾

字德剛萬載人官晉府長史文皇卽位被執不屈  
死之南都補諡忠愍

洪武十七年貢爲國子生授浙江按察使以累左遷長  
洲知縣等陞晉府左長史靖難師起徵兵于晉鍾引  
大義力主發兵潛邸卽位詔械公繫錦衣獄不屈死  
有收其遺骨得所自書贊曰捐生固殞弗事二主別  
父與兄忍慟肝腑盡忠爲臣盡孝爲子二端於我歸  
于一所衣色形骸歸于故土今其家書遺草及諸哀  
輓猶存云



明名臣言行錄卷第十五

徐忠貞公輝祖

初名允恭鳳陽人中山王長子嗣父襲封魏國公  
靖難後不屈下獄死南都補諡忠貞

身長八尺五寸顧盼有神王數鎮北平留宿衛御家家  
衆肅然理左府事月給祿二十石王還自北平道病  
疽手詔遣往迎勞王薨又三年戊辰襲爵賜誥稱揚  
中山之烈而勉公忠以立志禮以守身恪盡繼承之  
道明年賚公與諸公各黃金三百兩白金二千兩鈔  
三千錠文綺三十疋綾十疋俾還鳳陽賜第以歲時

入覲尋給兵百二十人爲衛復賜鈔四百錠皇太孫年長以嫌名賜今名詔還公田於官仍太倉支祿五千石

時故元降將阿魯帖木兒隸燕府有異志爲人所告齎密劄往諭王訥得實合策捕誅之還領中府又遣諭文皇送鹵鹵至京并出獵勤兵之法

二十九年會禮部翰林院試國子師生第優劣移吏部錄用公常侍懿文太子學通經書大義從詹希元學書善書大字戊寅閏五月建文帝卽位特見信任八月兼太子太傅

初高皇帝崩燕王使世子及高陽王高煦三子高燧臨京師公密奏請竟留世子等勿遣因言臣觀三甥中高煦尤勇悍無賴自倚騎射非惟不忠抑且叛父他日必爲大患而增壽力爲庇護得遣歸高煦歸則竊公善馬去

靖難兵起與齊黃盧振張昂葛誠通謀議督諸兵北進靖難兵至江上公及開國公常昇分道出師禦戰將士往往離散不肯向敵遂還京燕王入城獨守先廟不迎既卽位廷臣論劾令自陳狀止書中山王開國功文皇大怒曰此與齊泰輩同罪當誅沈吟久之削

爵錮私第尋下獄五年死或曰自裁

十八年上念中山王功大且以后恩召其長子釋伽保見賜名欽襲爵盡還誥券歲祿賜田明年來朝乞守父墓不待命辭上恨之復削爵徙鳳陽仁宗卽位欽來朝復爵尋卒弟增壽素通燕王爲建文帝手誅及卽位封武陽侯進定國公子孫世襲魏公雖得襲其恩數視定國差減云



駙馬都尉梅榮定公殷

字伯殷夏邑人汝南侯思祖從子尚高皇第二女  
寧國公主永樂二年仇家承上命擠死篴橋下

公恭謹有謀勤問學能騎射諸駙馬中高皇尤愛公十  
九年勅公提督山東學較兼理地方勅語謂公篤學  
精通經史堪爲儒宗受密命輔建文皇帝北兵起公  
充總兵官鎮守淮安悉心防禦號令嚴明文皇假道  
公割使人耳鼻口授詞答文皇曰留汝口與殿下言  
君父恩義文皇竟不得道淮安會有內間言南朝諸  
重將皆分屯山東京師空虛遂引兵直趨而南南諸

將反隔于後亟來追倉皇戰不利沿淮相持者數日糧乏欲走公合勢出戰俄以驚疑大潰諸將皆被執去乃渡泗水破盱眙出六合至京師卽帝位公尚據淮上上迫公主招公公主嚙指血爲書付李中使至公公得書慟哭詢皇帝所在中使曰去矣公曰君存與存君亾與亾吾姑忍俟之乃還京見上上曰駙馬勞苦曰勞而無功徒自慙耳文皇寵賚甚至公不能平時見詞色文皇疑之每夜遣小中官潛入公第察之公愈怒永樂二年冬都御史陳瑛言公招藏亾命私匿口人瓦剌灰與女秀才劉氏朋邪詛說幾得罪

上前後以公主故隱忍而心脚益甚明年冬早朝公  
讐家都督譚濶指揮趙曦令人擠公死笄橋下曦又  
誣公自投水死都督許成發其事上怒罪濶二人  
對曰此上命也奈何殺臣上大怒立命力士持金瓜  
落二人齒斬之謚殷榮定

初公主謂上果殺殷牽衣大哭問駙馬安在上笑曰爲  
公主踪跡賊無自苦公主謹護二子順昌景福上以  
順昌爲中府都督僉事景福爲旗手衛指揮僉事賜  
手書二甥曰朕不念爾母爾安得至今日二甥後俱  
改孝陵衛指揮使宣德中與世襲孫純成化辛丑進

士爲定遠知縣忤上官棄歸襲武階官至中都副留守

初北平兵起公主嘗貽書阻以大義文皇不答兵至淮  
北與公主書言與師不得已之故令遷居太平門外  
勿罹兵禍公主亦不答公死瓦刺灰持刀割仇人手  
足剖取其腸持祭公遂自縊于笏

都尉耿公璿

濠人父長興侯炳文尚懿末太子女文皇登極竟  
坐罪死

洪武中爲前軍都督僉事尚懿文太子長女江都郡主  
建文元年郡主進封公主公爲駙馬都尉掌前府事  
公勇悍有武容靖難兵起以王室懿親得預聞兵事  
炳文北行公方勸直搗北平已而炳文戰數敗公怏  
怏抱病時對公主悲泣建文君遜去杜門稱疾竟坐  
罪死公主復稱郡主永樂元年春憂卒

弟璵累官至後軍都督僉事靖難兵起與江陰侯吳高

及楊文率遼東兵圍永平不克退保山海關吳高被  
間奪兵徙廣西楊文守遼東獄數請攻永平以動北  
平文不聽靖難後獄論死

指揮宋公瑄

鄆國公晟之子洪武中爲叅隨舍人立功遷指揮僉事  
建文初陞府軍右衛指揮使數從諸將禦靖難兵有  
功靈璧之戰披甲躍馬先登斬首數級已而諸營兵  
敗瑄猶格鬪力屈死之靖難後晟功大著封西寧侯  
卒永樂六年兵部上侯諸子孫名乞嗣封公子本晟  
長孫宜嗣上惡公令瑄弟琥嗣侯琥尚安成公主琥  
弟瑛尚咸寧公主琥罪廢瑛嗣侯没于土木

指揮朱壯烈公鑑

北平行都司都指揮守大寧北兵至大寧諸將陳亨房  
寬皆降公力戰不支被縛罵不絕口死之建文君加  
卹典永樂檄中所謂萬段凌遲處死者卽公也南都  
補諡壯烈



指揮楊公松

爲都指揮耿炳文爲主帥駐兵真定遣公爲先鋒進據  
睢縣遣都督徐凱領軍十萬駐河間潘忠屯鄭州公  
帥驍勇者九千人進據雄縣約忠爲殿燕王謂諸將  
曰今夕中秋彼必不備飲酒爲樂此可破也亟行夜  
半至雄縣圍其城門而潘忠援兵未至公令軍士登  
城大罵燕師益憤黎明破其城而入公與麾下九千  
人戰死燕王度潘忠在鄭州未知城破必引衆來援  
遂命領兵千餘渡月漾橋伏水中又令軍士數人伏  
路側望見忠等接戰卽舉砲旣而忠等果至王進兵

逆擊之路傍砲舉水中伏兵亦起據橋忠戰敗急趨  
橋不得渡北兵腹背夾擊之遂生擒忠

都指揮謝公貴

洪武二十五年以錦衣指揮僉事陞河南都指揮僉事  
署山西行都司事二十八年坐趙隆事當死上特宥  
降河南衛指揮僉事建文初議削諸藩時燕王稱病  
朝廷名爲備鹵齊泰薦貴智勇爲北平都指揮使張  
昺爲布政使俾通王府官屬伺變練兵先發後聞元  
年六月公等在城七衛并屯田軍士布城內圍王  
城外牆又以木柵斷端禮等四門燕王聞之曰我病  
不出雖塞可也公等乘馬張蓋過王門不下又殺王  
城守卒軍士登城擐甲執兵飛矢入王城四面鼓噪

震動外勢日急而王已久知其故爲備甚嚴七月有  
醉卒磨刀于市者隣媪問故厲聲曰殺王府人媪竊  
以告指揮張信信入備告二人密謀乃召指揮張玉  
朱能等集護衛勇士八百人議先擒貴昺王曰彼防  
守如此猝難動須以計致之可也今朝廷遣內官逮  
護衛所屬悉依名收之就令差來內官召貴昺付所  
逮者貴昺必來來則縛之一夫力耳乃匿壯士譚淵  
等端禮門內遣召久之方至衛從甚衆至王門門者  
呵止其從惟貴昺得入至端禮門被擒王親臨詰斬  
之其從者猶未知移時不出稍稍散去遂攻九門黎

明巴克其八惟西直門未下令指揮唐雲單騎往諭  
守者皆散盡克九門起兵

都指揮彭公二

未詳始所自起

建文初爲北平都指揮驍勇善戰有威名兵起殺謝貴  
公急跨馬大呼市中曰燕府反從我有賞集兵得千  
餘人欲入端禮門文皇遣健卒龐來興丁勝格殺公  
兵亦散

都指揮馬公宣

北平都指揮使靖難兵起殺張昺謝貴公巷戰度不能  
勝東走薊州悉發守兵西逆戰不利復還州張玉等  
來攻閉城堅守文皇遣使反覆諭之終不聽諸將力  
攻公出戰又敗被執罵不絕口死建文帝褒卹其家

都指揮瞿襄烈公能

驍勇有名洪武中以四川都指揮使與同知徐凱統兵  
從涼國公由大渡河擊西番有功又與都督徐司馬  
爲副總兵從總兵都督聶緯討建昌叛酋月魯帖木  
兒已而改副涼國公藍玉公破賊雙狼寨建文卽位  
從李景隆爲裨將攻北平公力戰勢甚銳與其子通  
率精騎千餘人殺入張掖門景隆忌之令候大軍同  
進于是北平連夜汲水沃城方大寒冰凝而滑明日  
南軍雖欲登城不可得矣景隆兵大敗退駐白溝河  
北軍追及公父子奮踴躍所向披靡殺傷北軍甚衆

北軍遂却北有內官徇見者亦敢勇相當率衆力戰  
王自率數萬騎夾攻破之擒其都指揮何清時日已  
暝各收軍還營明日復戰王先以七騎馳擊之且進  
且退南軍飛矢如注馬三被剗三易射矢亦盡幾爲  
公所及王佯招後軍疑之脫去及日薄暮公復引衆  
躍而前大呼滅燕斬騎百餘人俞通淵滕聚復引衆  
來會會旋風起王見陣少動乃以勁騎繞出其後突  
入馳擊與高煦騎兵合遂斬公父子于陣通淵聚皆  
死精兵萬餘人並沒無一還者南都補謚襄烈



都指揮宋壯愍公忠

知勇有名洪武二十九年百戶有論死者非其罪也公  
疏救百戶御史劾公上曰忠率直無隱爲人請罪何  
罪爲并宥百戶戍邊三十年御史劉觀劾公作威福  
邀名譽調鳳陽中衛明年平羗將軍都指揮齊讓討  
西彝無功以公爲叅將從征鹵前將軍楊文以往凱  
旋復官錦衣視四川傳道建文元年三月勅公以都  
指揮總邊兵三萬屯開平盡簡燕府護衛壯士從公  
聽節制護衛胡騎指揮關童者素驍勇公遣童入京  
北平有永清左右衛左調屯彰德右調屯順德都督

徐竄屯臨清耿璣屯山海與公相犄角約北平藩閫  
張昺謝貴長史葛誠爲內應盡拘親藩官屬燕旣殺  
昺貴誠起兵公率兵三萬至居庸關適守將俞瑱敗  
走退保懷來燕兵遂守居庸文皇曰宋忠握兵懷來  
必爭關須乘其未至擊之衆皆曰敵衆我寡難與爭  
鋒宜固守以待王曰用兵當以智勝論力則我不足  
以智則有餘彼衆新集其心不一且忠輕躁寡謀狠  
愎自用先擊之必破乃率馬雲徐祥等精兵八千人  
卷甲倍道趨之甲申至懷來獲諜言公誑諸將士云  
爾等家在北平者並爲燕府誅滅盍努力復家讐報

國恩文皇聞之急令其家人張故旗幟爲先鋒衆呼  
其父兄弟相問勞家故無恙輒喜罵宋都督欺我  
倒戈走公率親兵倉卒列陣未成王一麾渡河大戰  
敗奔將入城不及被執諸將以得公頗有喜色王笑  
曰忠庸才耳得之不足爲喜喜則驕驕則不戒不戒  
則敗幾萌矣爾曹戒之遂誅忠子謙鎮南衛指揮使  
編軍伍後亦賜死南都補諡壯愍

明名臣言行錄卷之十一  
都指揮崇壯愍公剛

揚州衛世指揮其使同知僉事不可考矣建文初靖難兵起公練兵繕濬城濠御史王彬倚任之兵至專城守事屬公晝夜不解甲同列懷貳心者忌公畏彬不敢發及彬被執爲徐政所縛張本又素不喜公公亦不屈而死

都指揮余公瑱

北平都指揮使與謝貴密謀不遂貴死瑱走居庸關宋忠承制令公守關公簡練關卒得數千人將進攻北平王曰居庸險隘北平之咽喉百人守之萬夫莫窺我得此可無北顧憂公駐兵于此譬如家之後戶豈容他人措足非彼卽我勢豈兩立今彼不量力欲來攻城莫若乘其初至人心不服易以取也緩則增兵繕守後難圖矣令指揮徐安鍾祥千戶徐祥等擊公公且守且戰援兵不至棄關走懷來依忠再謀攻關忠兵又敗北兵給曰石頭城破矣應曰石頭城卽破

吾自與此城共存，力盡被執，不屈死。

都指揮彭公聚

北平都指揮與孫太副宋忠守懷來，忠敗，公力戰死。當是時，諸將校爲靖難兵所俘者百餘人，皆不肯降，發憤死大半，不可考矣。

都指揮孫勇愍公泰

都指揮使從宋忠戰懷來先登頗有斬獲靖難兵擇善射者並射公中矢流血被甲慷慨裹血力戰奮呼陷陣死之南都補諡勇愍

都指揮莊公得一

洪武末爲西涼都指揮召至北平爲燕兵右翼出塞有功建文初隸宋忠麾下懷來之敗惟得一軍得全盛庸戰夾河得一奮力助庸斬其大將譚淵北兵勁騎乘暮掩擊得一力戰死之

燕山左護衛倪公諒

上變告府中事府中官旗盡逮詔獄于諒周鐸誅死文  
皇卽位收諒殺之沒產壯者戍瘴鄉幼者刺離間親  
王字充錦衣鞍轡局幼軍



都督廖公鏞

巢縣人祖永忠開國功封德慶侯父權嗣封鏞以  
適子任散騎舍人歷官都督

建文中與議兵事時宿衛殿庭靖難後上以廖侯兩子  
鏞與銘嘗受學方孝孺令召之孝孺怒曰汝讀幾年  
書還不識箇是字兩子復命上怒令軍校收孝孺孝  
孺杖衰絰至闕下大哭上益怒令以刀抉其口兩笏  
至耳刑之聚寶門外凡七日罵聲不絕廖兩子拾遺  
骸葬聚寶門外山上甫畢廖氏亦見收兩子遂逃去  
永樂元年四月錦衣鎮撫司奏獲鏞銘送刑部論死

鏞弟鈇及從父淮安指揮僉事俱謫戍邊公母東甌  
王長女也并銘女送浣衣局